




Informativni bilten Općine Novo Sarajevo



IZDVAJAMO:

- *Nastavljene aktivnosti na rješavanju problema održavanja pothodnika u okviru kružnog toka na trasi Južne longitudinalne*
- *Definisani dalji koraci u vezi priključivanja Općine Novo Sarajevo uspostavljenim kantonalnim registrima imenovanih lica i zaposlenih u javnom sektoru*

Informativni bilten Općine Novo Sarajevo

NA 3. HITNOJ SJEDNICI OPĆINSKOG VIJEĆA NOVO SARAJEVO PODRŽANE ODLUKE DA ZAMJENICI PREDSEDAVAJUĆEG SVOJU DUŽNOST OBAVLJAJU VOLONTERSKI



Treća hitna sjednica Općinskog vijeća Novo Sarajevo, kojom je predsjedavao zamjenik predsjedavajućeg Nijaz Džaka, održana je u srijedu 10. februara ove godine u Međunarodnom centru za djecu i omladinu Novo Sarajevo.

Na početku sjednice, vijećnici su usvojili Odluku kojom predsjedavajućeg Općinskog vijeća Roberta Plešea odsutnog zbog samoizolacije određene radi infekcije COVID-19 zamjenjuje zamjenik predsjedavajućeg Nijaz Džaka, a najduže šest mjeseci.

U mandatnom periodu 2020.-2024. godina, Džaka Nijaz, Salihagić Nedim i Kalamujić Majda obavljaju svoju dužnost volonterski, a u skladu sa Prijedlozima Odluka o načinu obavljanja dužnosti zamjenika i zamjenice predsjedavajućeg Općinskog

vijeća koji su danas dobili vijećničku podršku.

Razmatran je i Prijedlog zaključka o tajnom glasanju putem mobilnog tima kojim se reguliše način glasanja vijećnika Općinskog vijeća Novo Sarajevo koji su u izolaciji zbog zaraze SARS-CoV-2 virusom i oboljenja COVID -19 za izbor vijećnika u Gradsko vijeće Grada Sarajeva. Zaključak je podržan sa 26 glasova.

Sjednica je prekinuta na četvrtoj tački dnevnog reda, odnosno izboru vijećnika delegiranih u Gradsko vijeće Grada Sarajeva ispred Općine Novo Sarajevo i biće nastavljena kada se za to steknu uslovi.

U NASTAVKU 3. HITNE SJEDNICE OPĆINSKOG VIJEĆA NOVO SARAJEVO IZVRŠENO GLASANJE ZA IZBOR VIJEĆNIKA DELEGIRANIH U GRADSKO VIJEĆE GRADA SARAJEVA IZ OPĆINE NOVO SARAJEVO

U Međunarodnom centru za djecu i omladinu Novo Sarajevo, u srijedu 17. februara ove godine, nastavljen je rad 3. hitne sjednice Općinskog vijeća Novo Sarajevo, kojom je predsjedavao zamjenik predsjedavajućeg Nijaz Džaka.

Ova sjednica je prekinuta, 10. februara ove godine, na četvrtoj tački dnevnog reda, odnosno izboru vijećnika delegiranih u Gradsko vijeće Grada Sarajeva ispred Općine Novo Sarajevo jer nisu bili stečeni uslovi za njen nastavak.

U nastavku sjednice, glasanju za izbor vijećnika u Gradsko vijeće pristupilo se u sali Međunarodnog centra, kao i putem mobilnog tima za tajno glasanje vijećnika Općinskog vijeća Novo Sarajevo koji su u izolaciji zbog zaraze SARS-CoV-2 virusom i oboljenja COVID -19.



Informativni bilten Općine Novo Sarajevo

Nakon prebrojavanja glasačkih listića, objavljeni su sljedeći rezultati kandidatskih lista:

GRUPA VIJEĆNIKA KORORA I OSTALI – 8 glasova

POLITIČKA ORGANIZACIJA “NAROD I PRAVDA” – 5 glasova

POLITIČKA STRANKA POG NAŠA STRANKA – 5 glasova

GRUPA OPĆINSKIH VIJEĆNIKA – ALMA ČENGIĆ – 4 glasa

POLITIČKA STRANKA SAVEZ ZA BOLJU BUDUĆNOST – SBB – 3 glasa

GRUPA OPĆINSKIH VIJEĆNIKA – DANIJELA ŠAHAT, RIAD IDRIZOVIĆ I EMIR RUSTEMPAŠIĆ – 3 glasa

GRUPA OPĆINSKIH VIJEĆNIKA – MARIJELA HAŠIMBEGOVIĆ – 3 glasa

POLITIČKA STRANKA PLATFORMA ZA PROGRES – 0 glasova

Prije glasanja, Elvedin Cernica izjasnio se da predstavnici Platforme za progres u Općinskom vijeću Novo Sarajeva neće glasati za kandidatsku listu Politička stranka Platforma za progres, već da će svoj glas dati drugim listama.

Kompletan materijal sa provedenog postupka izbora za Gradsko vijeće Grada Sarajeva u predviđenim rokovima biće dostavljen Centralnoj izbornoj komisiji Bosne i Hercegovine na potvrđivanje i konačnu raspodjelu mandata tj. 28 vijećnika iz četiri gradske općine.

DEFINISANI DALJI KORACI U VEZI PRIKLJUČIVANJA OPĆINE NOVO SARAJEVO USPOSTAVLJENIM KANTONALNIM REGISTRIMA IMENOVANIH LICA I ZAPOSLENIH U JAVNOM SEKTORU



Načelnik Općine Novo Sarajevo dr. Hasan Tanović održao je sastanak sa šefom Ureda za borbu protiv korupcije i upravljanje kvalitetom Kantona Sarajevo Dr. Erduanom Kafedžićem u cilju definisanja daljih koraka u vezi priključivanja Općine Novo Sarajevo uspostavljenim kantonalnim registrima imenovanih lica i zaposlenih u javnom sektoru, kao i registru javnih nabavki.

Radi se o inicijativi ministrice pravde Kantona Sarajevo Lejle Brčić koja je na sastanku sa načelnicima i predstavnicima sarajevskih općina održanom u Kantonu Sarajevo predložila priključivanje općina u već uspostavljene registre što bi stvorilo prostor za razmjenu kadra unutar javnog

sektora na zakonit način, uz prethodnu regulativu koju je potrebno usaglasiti i sa višim nivoima vlasti.

Na sastanku je razgovarano, između ostalog i o načinu upotrebe rada Registra, te web aplikacije zaposlenih u javnom sektoru.

Općinski načelnik dr. Tanović, također je izrazio spremnost za pokretanje procesa revizije diploma zaposlenih u Općini Novo Sarajevo na način na koji to provodi Ured za borbu protiv korupcije i upravljanje kvalitetom u Kantonu Sarajevo, te tom prilikom dobio punu podršku šefa Ureda.

Informativni bilten Općine Novo Sarajevo

SA PREDSTAVNICIMA DIREKCIJE ZA PUTEVE KS RAZGOVARANO O RJEŠAVANJU PROBLEMA I POBOLJŠANJU USLOVA ODVIJANJA SAOBRAĆAJA NA PODRUČJU OVE LOKALNE ZAJEDNICE

U zgradi Općine Novo Sarajevo održan je zajednički sastanak predstavnika Općine i Direkcije za puteve Kantona Sarajevo u cilju rješavanja problema i poboljšanja uslova odvijanja saobraćaja na području ove lokalne zajednice.

Na sastanku su prisustvovali Općinski načelnik dr. Hasan Tanović i direktor Direkcije za puteve KS Selmir Kovač sa saradnicima.

Kao jedan od ključnih problema navedeno je održavanje pothodnika u okviru novoizgrađenog kružnog toka u naselju Hrasno brdo koji je izložen stalnim devastacijama zbog čega nije bezbijedan za korištenje. Budući da je pothodnik još uvijek u nadležnosti Direkcije za puteve KS koja je implementator realizacije projekta izgradnje Južne longitudinalne, Općina Novo Sarajevo je u više navrata iskazala interes da preuzme održavanje istog. Imajući u vidu navedeno, na sastanku je dogovoreno da se intenziviraju sve neophodne aktivnosti oko prikupljanja potrebne dokumentacije što je preduslov za primopredaju ovog saobraćajnog objekta Općini Novo Sarajevo, a čime bi se u narednom periodu na adekvatan način vodilo računa o njegovom održavanju i povećanju sigurnosti za građane.

Načelnik dr. Tanović naveo je i probleme sa pješačkim prelazima na najfrekventnijim saobraćajnicama na području Općine, poput pješačkih prelaza u ulici Azize Šaćirbegović u blizini Centra „Vladimir Nazor“, te prelaza na Južnoj longitudinali, gdje je neophodno poboljšati horizontalnu i vertikalnu saobraćajnu signalizaciju u cilju bezbiječnosti pješaka, a naročito djece.

Direktor Direkcije za puteve KS Selmir Kovač podsjetio je da je u toku izrada godišnjeg Programa rekonstrukcije cesta na području Kantona Sarajevo za 2021. godine, te da Općina Novo Sarajevo svakako treba iskoristiti priliku i kandidovati najznačajnije saobraćajne projekte za tekuću godinu.

NASTAVLJENE AKTIVNOSTI NA RJEŠAVANJU PROBLEMA ODRŽAVANJA POTHODNIKA U OKVIRU KRUŽNOG TOKA NA TRASI JUŽNE LONGITUDINALE

U zgradi Elektro distribucije Sarajevo u utorak, 16. februara ove godine na inicijativu Direkcije za puteve Kantona Sarajevo održan je zajednički sastanak predstavnika Općine Novo Sarajevo, Direkcije za puteve Kantona Sarajevo i predstavnika javnih komunalnih preduzeća u cilju nastavka aktivnosti na rješavanju problema u okviru realizacije projekta izgradnje Južne longitudinalne, te održavanje pothodnika u okviru novoizgrađenog kružnog toka u naselju Hrasno brdo.

Na sastanku je, između ostalog, dogovoreno da se intenziviraju sve aktivnosti i ubrzaju potrebne procedure oko prikupljanja potrebne dokumentacije što je preduslov za primopredaju ovog saobraćajnog objekta Općini Novo Sarajevo, a čime bi se u narednom periodu na adekvatan način vodilo računa o održavanju pothodnika i povećanju sigurnosti građana.

Pothodnik je još uvijek u nadležnosti Direkcije za puteve KS koja je implementator realizacije projekta izgradnje Južne longitudinalne, a Općina Novo Sarajevo je u više navrata iskazala interes da preuzme održavanje istog.

Prisutni predstavnici nadležnih institucija dogovorili su konkretne korake za naredni period kako bi se što prije otklonile sve prepreke, te riješio ovaj dugogodišnji problem održavanja i upravljanja pothodnikom u okviru novoizgrađenog kružnog toka u naselju Hrasno brdo na trasi Južne longitudinalne.



www.novosarajevo.ba

Informativni bilten Općine Novo Sarajevo

OPĆINA NOVO SARAJEVO OBEZBIJEDILA DODATNA SREDSTVA ZA SANACIJU LIFTA U OBJEKTU KOLEKTIVNOG STANOVANJA U ULICI PORODICE RIBAR BR. 3

Vlada Kantona Sarajevo, odnosno Ministarstvo komunalne privrede, infrastrukture, prostornog uređenja, građenja, zaštite okoliša svake godine usvaja Program sanacije liftova. Općina Novo Sarajevo sufinansira sanaciju liftova na osnovu kriterija i rang liste Ministarstva, a sredstva se realizuju po principu sufinansiranja od strane Ministarstva, Općine i etažnih vlasnika.

U okviru Programa sanacije liftova Kantona Sarajevo za 2020.godinu potpisan je Sporazum za sanaciju lifta u objektu kolektivnog stanovanja u ulici Porodice Ribar br.3.

S obzirom da su radovi na sanaciji lifta u pomenutom stambenom objektu u toku, a zbog uočenih nedostataka, odabrani izvođač radova je putem Kantonalnog stambenog fonda Sarajevo koji je nosilac aktivnosti, uputio zahtjev za obezbjeđenjem dodatnih sredstava kako bi se ovaj projekat uspješno realizovao.

Prema navedenom principu sufinansiranja, Općinski načelnik dr. Hasan Tanović dao je saglasnost da se obezbijede dodatna finansijska sredstva za sanaciju lifta u objektu kolektivnog stanovanja na adresi Prodice Ribar br.3, kako bi se na što kvalitetniji i brži način riješio ovaj dugogodišnji problem stanovnika ovog ulaza.

Ukupna vrijednost sanacije lifta na ovoj adresi je oko 35.590 KM, od čega je Ministarstvo izdvojilo 21.174 KM, etažni vlasnici putem Upravnika zgrade 3.028 KM, dok je Općina Novo Sarajevo izdvojila 11.088 KM.

UREĐENJE ŠUMSKIH PODRUČJA I RIJEČNIH KORITA, OPREMANJE POSLOVNIH ZONA I PODRŠKA PRIVREDNICIMA GLAVNI SU PRIORITETI SARADNJE MINISTARSTVA PRIVREDE KS I OPĆINE NOVO SARAJEVO



U zgradi Općine Novo Sarajevo u ponedjeljak, 08. februara ove godine održan je sastanak sa ministrom privrede Kantona Sarajevo Adnanom Delićem.

Općinski načelnik dr. Hasan Tanović inicirao je današnji sastanak u cilju dogovora o budućoj saradnji na realizaciji zajedničkih projekata, ali i rješavanja značajnih pitanja iz oblasti privrede za ovu lokalnu zajednicu.

U svom obraćanju ministar Delić istakao je da će Ministarstvo privrede KS biti na prvoj liniji podrške maloj privredi kroz razne poticaje, a da se od općina očekuje da uspostave efikasno informisanje i promociju mogućnosti poticaja, te omoguće edukaciju privrednika i pomoć koja se tiče pripreme dokumentacije za apliciranje za poticaje.

“Činjenica da je Općina Novo Sarajevo bila inicijator ovog sastanka mnogo govori o otvorenosti kako komunikacije tako i uspješne buduće saradnje između viših i nižih nivoa vlasti, u ovom slučaju Ministarstva privrede KS i Općine Novo Sarajevo“ istakao je ministar Adnan Delić.

Općina Novo Sarajevo, Zmaja od Bosne 55 tel.: centrala 492 100; fax: 644 559 ; www.novosarajevo.ba



www.novosarajevo.ba

Informativni bilten Općine Novo Sarajevo

Na današnjem sastanku razgovarano je o podsticajima za privrednike u cilju prevazilaženje posljedica nastalih uslijed pandemije, zatim podrške u opremanju poslovnih zona, uređenja šumskih područja, kao i uređenja riječnih korita na području Općine Novo Sarajevo.

Ministar Delić naglasio je ovom prilikom da Fond za podršku i saniranje posljedica pandemije za 2021. godinu iznosi 21 milion KM, te da se pozicija i uloga Ministarstva privrede KS u odnosu na lokalne samouprave najviše ogleda kroz opremanja industrijsko – poslovnih zona, te direktnim poticajima privredi.

Budući da je prema riječima ministra cilj ovog ministarstva da se predviđeni budžet za 2021. godinu iskoristi maksimalno efikasno i svrsishodno sa fokusom na projekte od visokog razvojnog karaktera i privrednog prioriteta, Općina Novo Sarajevo delegirat će nekoliko važnih projekata za ovu lokalnu zajednicu iz ove oblasti.

SA PREDSTAVNICIMA KJKP „TOPLANE-SARAJEVO“ O BROJNIM TEMAMA OD INTERESA ZA GRAĐANE NOVOG SARAJEVA

Općinski načelnik dr. Hasan Tanović na radnom sastanku sa predstavnicima KJKP „Toplane- Sarajevo“ v.d. direktorom Amelom Đogićem i v.d. izvršnim direktorom za ekonomsko-finansijske poslove Predragom Mladenom razgovarao je o brojnim temama koje su od interesa za građane, te su značajne za zaštitu okoliša i čistiji zrak.

Na području Kantona Sarajevo, ovo preduzeće zagrijava više od 51.000 stanova i 2.700 pripadajućih poslovnih prostora i objekata priključenih na sistem centralnog zagrijavanja. Najveći broj njihovih potrošača je na području Općine Novo Sarajevo gdje se nalazi i najviše kotlovnica. Sve kotlovnice su na gas, ali imaju mogućnost alternativnog prelaska na druge energente. U narednom periodu, u planu KJKP „Toplane- Sarajevo“ su rekonstrukcije kotlovnica, kao i distributivne mreže.

Ovom prilikom, istaknuto je da nedavno trajno riješen dugogodišnji problem grijanja u Kampusu UNSA čime se obezbjeđuje urednije i bolje grijanje svih korisnika u tom kompleksu koji se nalazi na području naše lokalne zajednice.

Cilj ovog preduzeća je održavanje stabilnog energetskeg sistema u Kantonu Sarajevo, te nastavak aktivnosti na zaštiti prirodne sredine u čemu imaju podršku Općine Novo Sarajevo.

OPĆINSKI NAČELNIK DR. HASAN TANOVIĆ RAZGOVARAO SA GRAĐANIMA O PROBLEMIMA U MJESNIM ZAJEDNICAMA HRASNO I HRASNO BRDO



Problemi sa saobraćajem u mirovanju, uređenje javnih parkovskih površina i dječijih parkova jedni su od najvećih problema stanovnika Mjesne zajednice „Hrasno“, istakli su članovi Savjeta ove mjesne zajednice na sastanku održanom sa Općinskim načelnikom dr. Hasanom Tanovićem u prostorijama MZ „Hrasno“.

Načelnik dr. Tanović sa saradnicima obišao je mjesne zajednice Hrasno i Hrasno brdo, te razgovarao sa predstavnicima građana ovih mjesnih zajednica o njihovim problemima i potrebama, ali i iznalaženju rješenja, te realizaciji budućih projekata.

Jedino adekvatno rješavanje problema saobraćaja u mirovanju je izgradnja podzemnih garaža a to je proces koji iziskuje značajna finansijska sredstva, istakao je načelnik, te dodao da bez obzira na navedeno, Općina će planirati izgradnju istih u saradnji sa višim nivoima vlasti, kao i realizaciju alternativnih rješenja kada je ovaj problem u pitanju pretvaranjem postojećih saobraćajnica u jednosmjerne čime se će se dobiti određen broj novih parking mjesta u naseljima.

Informativni bilten Općine Novo Sarajevo

U naselju Hrasno brdo, prema riječima predsjednika Savjeta ove mjesne zajednice veliki problem predstavlja legalizacija dijela individualnih objekata u naselju Šanac koji se nalaze još uvijek na vojnom zemljištu i iz tog razloga ovi objekti imaju problem sa vodovodnom i kanalizacionom mrežom, a preduslov za rješavanje ovog problema je usvajanje RP Brdo Hrasno.

Budući da je u naselju Hrasno brdo planirana izgradnja dječijeg igrališta u ulici Varaždinska, općinski načelnik sa saradnicima obišao je lokaciju na kojoj je planirana gradnja, kao i nove prostorije Mjesne zajednice Hrasno brdo.

UPUĆENA URGENCIJA KJKP „RAD“ DA SE PODUZMU SVE AKTIVNOSTI NA UKLANJANJU PREKOMJERNOG OTPADA U NASELJU GRBAVICA

Nakon saznanja sa terena da je na području Općine Novo Sarajevo u naselju Grbavica evidentirana prekomjerna količina otpada, kako uz saobraćajnice i pješačke staze, tako i u, te oko kontejnera koji su smješteni pored objekata kolektivnog stanovanja, Općina Novo Sarajevo odmah je uputila urgenciju prema nadležnom KJKP „Rad“ da poduzmu sve što je u njihovoj moći i nadležnosti da se ovaj dio naselja što prije očisti.



KJKP „RAD“ su istakli da se dešava da su kontejneri radnim danima pretrpani kućnim otpadom što je rezultat reduciranog pražnjenja istih zbog zastarjelih vozila koja koristi KJKP „Rad“ za odlaganje otpada, a i evidentan je nedovoljan broj istih za operativne poslove.

Poseban problem, kako navode, predstavlja i nedovoljan broj ljudi na ručnom održavanju javne higijene, ali da će se već u četvrtak, 11. februara organizovati da se u naselju Grbavica krene sa čišćenjem javnih površina.

Iako nije direktna nadležnost lokalnih zajednica, Općina Novo Sarajevo će poduzeti sve što je u njenoj mogućnosti da se unaprijedi održavanje higijene javnih površina na području ove Općine, jer stanje na terenu je još uvijek nezadovoljavajuće.

PROLJETNO POSPREMANJE TROTOARA I SAOBRAĆAJNICA NA PODRUČJU OPĆINE NOVO SARAJEVO

Radnici KJKP „Rad“ nastavljaju aktivnosti proljetnog pospremanja trotoara i saobraćajnica na području Općine Novo Sarajevo. Radnici Radne Jedinice Novo Sarajevo u utorak i srijedu, 16. i 17. februara vršili su uklanjanje frakcije i prašine sa trotoare i rigola u ulicama: Derviša Numića, Hamdije Čemerlića, Radnička, Kolodvorska, Zagrebačka, Grbavička (glavna i sporedne saobraćajnice), Azize Šaćirbegović, Antuna Branka Šimića i Milana Preloga.

Aktivnosti će biti nastavljene i u narednom periodu.



Informativni bilten Općine Novo Sarajevo

AMBASADOR SLOVAČKE REPUBLIKE U BIH NJEGOVA EKSCLENCIJA MARTIN KAČO U POSJETI OPĆINI NOVO SARAJEVO



Ambasador Slovačke republike u BiH Njegova eksclencija Martin Kačo, Počasni konzul Slovačke Republike Rajko Zelenika i direktor firme Haris Gušić GLOBTOUR Međugorje posjetili su Općinu Novo Sarajevo gdje ih je primio Općinski načelnik dr. Hasan Tanović sa saradnicima.

Na sastanku je razgovarano o budućim zajedničkim projektima i aktivnostima Općine Novo Sarajevo i Ambasade Slovačke, kao i unapređenju dosadašnje međusobne saradnje kada je u pitanju o prevozu učenika, koji stanuju na području padinskih novosarajevskih mjesnih zajednica do škola i nazad.

ODRŽAN SASTANAK SA PREDSTAVNICIMA CENTRA ZA PROMOCIJU CIVILNOG DRUŠTVA (CPCD) U CILJU UNAPREĐENJA SARADNJE VLADINOG I NEVLADINOG SEKTORA NA PODRUČJU OPĆINE NOVO SARAJEVO

Načelnik Općine Novo Sarajevo dr. Hasan Tanović održao je sastanak sa direktoricom Centra za promociju civilnog društva (CPCD) Aidom Dagudom u cilju unapređenja saradnje vladinog i nevladinog sektora, te realizacije budućih zajedničkih projekata.

Direktorica Daguda istakla je kako Centar za promociju civilnog društva ima veliko iskustvo u izradi i implementaciji projekata koje finansira EU, USAID, Švedska i ostali donatori, te da se trenutno, između ostalih implementira i projekat "Misli o prirodi!" u okviru kojeg saraduju sa velikim brojem okolišnih udruženja, a jedno od tih je i Udruženje „Aarhus centar“ sa područja Općine Novo Sarajevo.

O uspostavi Smart Resursnog centra prisutne je upoznala Dajana Cvjetković, menadžerica programskih aktivnosti CPCD-a. Radi se, naime o instituciji za obrazovanje odraslih, akreditovane od strane Ministarstva obrazovanja, nauke i mladih Kantona Sarajevo, a koja pruža usluge obuke za izradu i implementaciju projekata po EU standardima.

Općinski načelnik dr. Hasan Tanović zahvalio se direktorici Dagudi na iniciranju ovog sastanka na kojem je iskazana spremnost za pružanje stručne pomoći i podrške ovoj lokalnoj zajednici sa ciljem boljeg ostvarivanja strateških ciljeva Općine, a naročito sa aspekta što većeg uključivanja građana u javne konsultacije na području Općine, te podrške razvoju i jačanju kapaciteta nevladinih organizacija u procesima privlačenja EU fondova.

„Općina Novo Sarajevo je otvorena za dalju saradnju kada je u pitanju implementacija ovih i sličnih aktivnosti a koje će doprinijeti pozitivnim promjenama u ovoj važnoj oblasti“, istakao je načelnik dr. Tanović.

PREDSTAVNICI SOS DJEČIJEG SELA SARAJEVO PREDSTAVILI OPĆINSKOM NAČELNIKU RAD I AKTIVNOSTI CENTRA ZA RANI RAST I RAZVOJ

Predstavnici SOS Dječijeg sela Sarajevo posjetili su Općinu Novo Sarajevo, te sa Općinskim načelnikom dr. Hasanom Tanovićem razgovarali o aktivnostima i projektima koje provodi ova organizacija čiji je cilj pružiti porodično okruženje, ljubavi, osjećaj pripadnosti i edukaciju za više stotina djece bez roditeljskog staranja.

Direktor Programa SOS Dječijeg sela Adnan Alikadić pomenuo je nekoliko značajnih projekata koji se realizuju posljednjih godina poput uspostave i rada Centra za rani rast i razvoj, te projekta „Jačanje porodice“.

Dosadašnja saradnja sa Općinom Novo Sarajevo je bila uspješna, budući da su korisnici SOS Dječijeg sela, redovni učenici, godinama korisnici općinske stipendije koja se dodjeljuje za djecu bez oba roditelja, istakao je Alikadić, te dodao da se nada će se ova saradnja u narednom periodu i unaprijediti.

Informativni bilten Općine Novo Sarajevo



S obzirom da u SOS Centru za rani rast i razvoj djeluje tim profesionalaca, koji u saradnji sa roditeljima prate dječiji rast i razvoj od rođenja do desete godine, a čime se stimuliše pravilan rast i razvoj djece s ciljem da se svakom djetetu omogući razvoj i dostizanje punog potencijala, Općinski načelnik dr. Hasan Tanović istakao je da će Općina Novo Sarajevo iznaći načina da podrži aktivnosti i rad ovog Centra u okviru svojih mogućnosti.

Putem općinske Službe za socijalna pitanja, zdravstvo, izbjeglice i raseljena lica i Službe socijalne zaštite Novo Sarajevo pokušat ćemo animirati što više roditelja i djece da se uključe u aktivnosti ovog Centra, te preveniraju eventualni nastanak određenih

poteškoća u razvoju svog djeteta, istakao je načelnik dr. Tanović. U narednom periodu planirana je i posjeta delegacije Općine Novo Sarajevo SOS Dječijem selu Sarajevo.

POSJETA CENTRU ZA ODGOJ, OBRAZOVANJE I REHABILITACIJU „VLADIMIR NAZOR“- ODJEL ZA PREDŠKOLSKI ODGOJ I UPOZNAVANJE SA RADOM OVE ODGOJNO-OBRAZOVNE USTANOVE

Načelnik Općine Novo Sarajevo dr. Hasan Tanović posjetio je Centar za odgoj, obrazovanje i rehabilitaciju „Vladimir Nazor“- Odjel za predškolski odgoj koji pohađaju djeca sa razvojnim teškoćama uzrasta od 3 godine do polaska u školu.

Tokom obilaska predstavljene su aktivnosti ove odgojno-obrazovne ustanove kojom je obuhvaćeno 62 djece uzrasta od 4 do 7 godina raspoređenih u 12 grupa. Sa djecom rade defektolozi, logopedi, fizioterapeuti, psiholozi, medicinske sestre i asistenti, te zahvaljujući i njihovoj upornosti bilježi se brz napredak u usvajanju novih znanja. Sva djeca imaju i redovne individualne tretmane.



Na osnovu opservacije i procjene izrađuje se Individualni plan i program za svako dijete, kreiraju ciljevi za sva razvojna područja i provode edukacijski i rehabilitacijski programi. U radu se primjenjuju asistivne tehnologije i slikovni rječnik.

Svako dijete ima izrađen Individualni plan i program u kojem su postavljeni ciljevi za sva razvojna područja u skladu sa njegovim jakim stranama, sposobnostima i afinitetima.

Opremanjem logopedskog kabineta omogućeno je podizanje kvaliteta stručnih logopedskih usluga, dok se u sportskoj sali Odjela za predškolski odgoj odvijaju motoričke i druge aktivnosti.

Ova odgojno-obrazovna ustanova nalazi se u ulici Kemala Kapetanovića br. 43 na Grbavici.

Informativni bilten Općine Novo Sarajevo

UZ PODRŠKU OPĆINE NOVO SARAJEVO NAJTROFEJNIJI KARATE KLUB KBS „PERFEKT“ NASTAVLJA SA PROMOCIJOM KARATE SPORTA NA PODRUČJU OVE LOKALNE ZAJEDNICE

Karate klub “Perfekt” jedan je od najtrofejnijih karate klubova na području općine Novo Sarajevo i šire, a do sada broji više od 200 članova svih generacija.

Predsjednik Kluba borilačkih sportova „Perfekt“ Armin Topalović posjetio je Općinu Novo Sarajevo gdje je održao sastanak sa Općinskim načelnikom dr. Hasanom Tanovićem.

Na sastanku je razgovarano o članstvu, uspjesima, ciljevima, te narednim planovima i aktivnostima ovog sportskog omladinskog kluba koji je do sada treninge održavao na nekoliko lokacija na području općine Novo Sarajevo. S tim u vezi, Općinski načelnik dr. Tanović dao je punu podršku ovom novosarajevskom klubu, koji punim kapacitetima kontinuirano radi na promociji i omasovljavanju karate sporta.

Budući da su na sastanku istakli da nemaju adekvatne prostorne mogućnosti za treniranje, Općinski načelnik je dao saglasnost da u narednom periodu KBK „Perfekt“ treninge u određenim terminima održava u prostorijama MZ „Pofalići II“, a kojeg su procijenili kao najadekvatniji za ove namjene.

KBS “Perfekt” dobitnik je jednog od najvećih Općinskih priznanja “Srebrna plaketa Općine Novo Sarajevo” za 2017. godinu.

U znak zahvalnosti, predsjednik Kluba Armin Topalović uručio je načelniku simboličan poklon.



OPĆINA NOVO SARAJEVO JEDNA OD PRVIH OPĆINA KOJA ĆE POSTATI DIO PROJEKTA „JAVNA RASPRAVA LOKAL”

Predstavници Udruženja “Zašto ne” održali su sastanak u zgradi Općine Novo Sarajevo sa Općinskim načelnikom dr. Hasanom Tanovićem i predstavnicima administrativno-tehničkog osoblja Općina Novo Sarajevo.

Na sastanku je Udruženje predstavilo pilot projekat “Javna rasprava Lokal”, web platformu koja će služiti kao sredstvo poboljšanja dvosmjerne komunikacije između građana/ki i donosilaca odluka na lokalnom nivou.

Načelnik dr. Tanović i drugi prisutni na sastanku upoznali su se sa ciljem nove platforme, odnosno činjenicom da će ona omogućiti informisanje građana o nadležnostima i aktivnostima načelnika i Općinskih vijeća, ali i promovirati transparentnost, odgovornost i otvorenost u njihovom radu.

Koordinatorica projekta Selma Aščerić i predsjednik Udruženja Darko Brkan istakli su da platformu pokreću sa ciljem ukazivanja važnosti učešća javnosti u radu javne uprave, te kako bi omogućili aktivno učešće svih

Informativni bilten Općine Novo Sarajevo

zainteresovanih strana u procesu donošenja odluka na lokalnom nivou.

S druge strane, kako su na sastanku pojasnili, od ove platforme će korist imati i Općina, jer mogu imati uvid u ono što građani/ke Općine žele. Platforma, naime, nudi mogućnost građanima da direktno komuniciraju sa načelnicima i vijećnicima, a daje i dodatne informacije o inicijativama koje su u proceduri, kao i druge vijesti u vezi sa svim značajnim akterima na lokalnom nivou.

“Javna rasprava Lokal je pilot projekat platforme javnorasprava.ba, a plan je da se projekat u narednom

periodu proširi na deset općina u Bosni i Hercegovini. Naime, dosadašnje aktivnosti UG “Zašto ne” pokazuju da su lokalne vlasti mnogo interesantnije građanima/kama od entitetskih i državnih nivoa vlasti, jer direktno utiču na kvalitet njihovog života. S obzirom na navedeno, ova platforma je dizajnirana tako da pruži sve potrebne informacije građanima i građankama o tome šta radi općina, šta je u nadležnosti načelnika, a šta u nadležnosti vijećnika. Ako je građani i građanke budu aktivno koristili – kako smo i zamislili – ova platforma može biti važno sredstvo za osiguravanje da općina bude učinkovita u rješavanju problema običnih građana i građanki”, izjavila je koordinatorka projekta Selma Aščerić.

Nakon što je načelnik dr. Hasan Tanović istakao je da će Općina Novo sarajevo podržati ovaj projekat time je ova Općina postala jedna od prvih lokalnih zajednica koja će postati dio ovog važnog projekta. Na sastanku je također zaključeno da bi nova web platforma trebala biti predstavljena i Općinskom vijeću, a kako bi se definirali daljnji koraci u pogledu saradnje.

REALIZACIJA PROJEKTA „ACTIVE SENIOR ACADEMY“ KOJI IMPLEMENTIRA FONDACIJA BRAĆE SOLUNIAN – ĆIRIL I METODIJE I PARTNERI IZ POLJSKE, HRVATSKE, SRBIJE, UKRAJINE I BOSNE I HERCEGOVINE

Udruženje „Partnerstvo za javno zdravlje“ koje realizuje projektne aktivnosti „Mreža Centara za zdravo starenje Općine Novo Sarajevo“ je partner u projektu „Active Senior Academy“ koji implementira Fondacija braće Solunian – Ćiril i Metodije i partneri iz Poljske, Hrvatske, Srbije, Ukrajine i Bosne i Hercegovine. Projekt finansira Europska Komisija i realizacija projekta traje 30 mjeseci počevši od septembra 2020. godine.

Projektna aktivnost koja je planirana za BiH je – „Sport u radu sa starijim osobama“, a prva edukacija održava se od 16.02. do 20.02.2021. kojoj će prisustvovati svi partneri u projektu. Tim povodom, u prostorijama Centra za zdravo starenje Hrasno u srijedu, 17. februara održana je edukacija na temu provođenja aktivnosti Centra za zdravo starenje Općine Novo Sarajevo s osvrtnom na preventivno – korektivnu gimnastiku za starije osobe. Današnjem događaju prisustvovao je Općinski načelnik dr. Hasan Tanović sa saradnicima, te partneri iz Poljske, Hrvatske, Srbije i Ukrajine, a uz poštivanje svih preventivnih mjera zaštite zbog epidemiološke situacije uzrokovane COVID-19.



Informativni bilten Općine Novo Sarajevo

Prezentaciju o važnosti fizičke aktivnosti i sporta za osobe treće životne dobi pripremila je dr. Aida Ramić ispred Zavoda za javno zdravstvo FBiH, a prisutni učesnici radionice imali su priliku postavljati pitanja, razmjenjivati svoja iskustva i razgovarati sa dr. Ramić.

Predstavnici Fondacija braće Solunian – Ćiril i Metodije iz Poljske Općinskom načelniku dr. Tanoviću uručili su simboličan poklon uz želje za uspjeh u daljem radu i promovisanju zdravih stilova života osoba treće životne dobi putem novosarajevskih centara za zdravo starenje.

U OPĆINI NOVO SARAJEVO PREDSTAVLJEN PROJEKAT „INTERKULTURALNA MREŽA PRIJATELJSTVA” KOJI POVEZUJE SREDNJOŠKOLCE SA PODRUČJA BALKANA



Učenice četvrtog razreda Srednje škole poljoprivrede, prehrane, veterine i uslužnih djelatnosti sa profesoricom nutricionizma Suadom Karić posjetile su Općinu Novo Sarajevo. U razgovoru sa predsjedavajućim Općinskog vijeća Novo Sarajevo Robertom Plešecom, načelnikom Općine Novo Sarajevo Hasanom Tanovićem i vijećnikom u Općinskom vijeću Novo Sarajevo Riadom Idrizovićem predstavile su internacionalni projekat „Interkulturalna mreža prijateljstva” koji se odvija u nekoliko modula.

U svakom modulu koji traje pet mjeseci ima deset afirmativnih zadataka za učenike. U toku je realizacija trećeg zadatka pod nazivom „Lideri dobrote i ljubavi“ s ciljem je da se pokaže šta znači darivati i poklanjati, a ne očekivati ništa zauzvrat. Urađen je i emotivan video

za Petrinju kojima je upućena poruka ljubavi, rekla je prof. Karić. Precizirala je da je namjera i da se učenici ohrabre da prošire svoje znanje u oblasti digitalnih vještina.

Nakon razgovora u Općini Novo Sarajevo, učenice i njihova profesorica zajedno sa predsjedavajućim Općinskog vijeća Novo Sarajevo posjetili su Javnu ustanovu Centar za odgoj, obrazovanje i rehabilitaciju „Vladimir Nazor“- Odjel za predškolski odgoj.

Ovom prilikom, iskazana je želja za unapređenjem saradnje na projektima namijenjenim djeci, kao i zaštite okoliša.

BUDUĆE AKTIVNOSTI I UNAPRJEĐENJE SARADNJE U FOKUSU RAZGOVORA OPĆINE NOVO SARAJEVO I UDRUŽENJA „1. SLAVNA-VITEŠKA BRIGADA“ SARAJEVO

Načelnik Općine Novo Sarajevo dr. Hasan Tanović razgovarao je sa predstavnicima Udruženja „1. Slavna-viteška brigada“ Sarajevo o unaprjeđenju saradnje i aktivnostima na koje se potrebno usmjeriti u narednom periodu. Prije svega sa aspekta realizacije projekata koji osiguravaju samofinansiranje i dugoročnu održivost.

Udruženje „1 Slavna-viteška brigada“ Sarajevo baštini put jedne od rijetkih jedinica u sastavu Armije BiH koja je nakon slavnog dobila i počasni naziv viteška. Kroz brigadu je prošlo 7.000 boraca. Život je izgubilo 624 pripadnika. Više od 2.000 pripadnika je teže ili lakše ranjeno, a za iskazanu hrabrost njih 71 je dobilo ratno priznanje „Zlatni ljiljan“.



Informativni bilten Općine Novo Sarajevo



U okviru svojih aktivnosti, u prethodnom periodu organizovali su i edukacije za učenike novosarajevskih osnovnih škola koje su upoznali o historijskim dešavanjima u periodu 1992.-1995. godina. Ovo Udruženje nastavlja sa obilježavanjem svih značajnih događaja, datuma i ličnosti NOR-a 1941-1945. godine i odbrambeno-oslobodilačkog rata 1992.-1995. godine u čemu imaju podršku Općine Novo Sarajevo.

U ime Udruženja „1 Slavna-viteška brigada“ Sarajevo, predsjednik Nusret Aganović uručio je općinskom načelniku dr. Hasanu Tanoviću monografiju pod nazivom „ Za Sarajevo, za Bosnu svoju“.

OBILJEŽEN DAN SJEĆANJA NA SVE POGINULE GRAĐANE SARAJEVA U PERIODU 1992-1995. GODINE I 27. GODIŠNJICA OD MASAKRA GRAĐANA NA PIJACI MARKALE



Petog februara obilježava se Dan sjećanja na sve poginule i ranjene građane Sarajeva od agresora u periodu opsade 1992.-1995. godine i 27. godišnjica od masakra građana na pijaci Markale.

Tog dana, projektilom kalibra 120 milimetara koji je ispaljen sa agresorskih položaja sa područja Mrkovića na pijacu Markale ubijeno je 68 ljudi, a ranjena su 142 naša sugrađanina.

Tim povodom, u Narodnom pozorištu održana je Zajednička komemorativna sjednica Skupštine Kantona Sarajevo, Gradskog vijeća Sarajeva i općinskih vijeća sa područja Kantona Sarajevo, a uz poštivanje važećih epidemioloških mjera. Komemorativnoj sjednici prisustvovao je načelnik Općine Novo Sarajevo dr. Hasan Tanović i predsjedavajući Općinskog vijeća Novo Sarajevo Robert Pleše.

Informativni bilten Općine Novo Sarajevo

O najtežem periodu u bosanskohercegovačkoj historiji govorio je prof. dr. Mirko Pejanović koji je, između ostalog, podsjetio da se na 230 mjesta u Sarajevu tokom rata dogodilo stradanje civila. Ratni plan o etničkoj podjeli i rušenje države BiH, dodao je, nije prezao od upotrebe vojne sile da svakodnevnim granatiranjem sa linija opsade dovede do masovnog ubojstva građana Sarajeva. Nakon komemorativne sjednice, brojne delegacije svih nivoa vlasti, kao i Općine Novo Sarajevo su polaganjem cvijeća odali počast ubijenim u masakru na pijaci Markale.



Na današnji dan prije 27 godina poginuli su: Senad Arnautović, Ibrahim Babić, Mehmed Baručija, Ćamil Begić, Emir Begović, Vahida Bešić, Gordana Bogdanović, Vaskrsije Bojinović, Muhamed Borovina, Faruk Brkanić, Sakib Bulbul, Jelena Čavriz, Almasa Čehajić, Zlatko Čosić, Alija Čukojević, Verica Ćilimdžić, Smilja Delić, Ifet Drugovac, Dževad Durmo, Fatima Durmo, Kemal Džebo, Ismet Fazlić, Vejsil Ferhatbegović, Dževdet Fetahović, Muhamed Fetahović, Ahmed Fočo, Majda Ganović, Isma Gibović, Rasema Hasanović, Alija Hurko, Mirsada Ibrulj, Mustafa Imanić, Rasema Jažić, Razija Junuzović, Hasija Karavdić, Mladen Klačar, Marija Knežević, Selma Kovač, Ibro Krajčin, Sejda Kunić, Jozo Kvesić, Numo Lakača, Ruža Malović, Jadranka Minić, Nura Odžak, Mejra Orman, Hajrija Oručević, Seid Prozorac, Smajo Rahić, Igor Rehar, Sabit Rizvo, Zahida Sablja, Nedžad Salihović, Hajrija Smajić, Emina Srnja, Džemo Subašić, Šaćir Suljević, Hasib Šabanović, Ahmed Šehbajraktarević, Bejto Škrijelj, Junuz Švrakić, Pašaga Tihović, Munib Torlaković, Ruždija Trbić, Džemil Zečić, Muhamed Zubović i Senad Žunić.

Tokom 1.425 dana opsade glavnog grada Bosne i Hercegovine ubijeno je 11.541 građana Sarajeva, među kojima i 1.601 dijete. Ranjeno je više od 61.136 civila, od čega čak 14.947 djece.

SJEĆANJE NA FEHIMA AGIĆA-AGU, HEROJA SA ŽUČI I ZLATNOG LJILJANA

Na Šehidskom mezarju Kovači obilježena je godišnjica pogibije sarajevskog heroja Fehima Agića-Age.

Načelnik Općine Novo Sarajevo dr. Hasan Tanović, zamjenik predsjedavajućeg Općinskog vijeća Novo Sarajevo Nijaz Džaka i vijećnik Riad Idrizović, kao i predstavnici Ministarstva za boračka pitanja Kantona Sarajevo i Udruženja „1. Slavna-viteška brigada“ položili su cvijeće i odali počast na centralnom nišanu na Šehidskom mezarju Kovači, mezarju vrhovnog komandanta Armije RBiH Alije Izetbegovića i na mezarju Fehima Agića-Age.



Fehim Agić-Aga je rođen 13.02.1968. godine u Sarajevu. U redove Armije RBiH stupio je 06.04.1992. godine. Najviše ratno priznanje „Zlatni ljiljan“ dobio je 1992. godine i odlikovan je činom majora A RBiH. Poginuo je 19.02.1993. godine na brdu Žuč / Golo brdo, na dužnosti zamjenika komandanta 1. bataljona 1. mehanizovane brigade.



Općina Novo Sarajevo

Sarajevo, 01. 03. 2021. godine

69. izdanje



**Bosna i Hercegovina
Federacija BiH
Kanton Sarajevo
Općina Novo Sarajevo**

Izdavač: Općina Novo Sarajevo

tel: +387 33 492 100

Fax: +387 33 644 559

Press: tel: +387 33 492 275/6

Fax: +387 33 492 342

E-mail: novosarajevo@novosarajevo.ba

press@novosarajevo.ba

www.novosarajevo.ba

UREĐIVAČKI TIM: *Elvira Zahiragić, Sunčica Zuban*

FOTOGRAFIJE: *Želimir Kozić*

DTP: *Odsjek za informisanje, odnose s javnošću i protokolarne poslove*